

Kapítulo 4

HOSE SMITH INVESTIGA

No por minimalisá Hosé Smith su importansia pa mormonismo. Di bèrdat Iglesia di Hesukristo di e Santunan di e Deláster Dianan ta pone Smith riba un nivel asina haltu ku lo tabata mas onesto pa saka Hesukristo for di nan nòmber ofisial i remplas'é ku Hosé Smith. Brigham Young a skirbi:

"...eksaminá karakter di e Salvador, i eksaminá karakter di esnan ku a skirbi Tèstament Bieu i Nobo; anto kompará nan ku karakter di Hosé Smith...i lo bo haña ku su karakter ta keda mes bunita ku esun di kualke hòmer menshoná den Beibel. Ora tur kos ta konosí, nos no por haña un persona ku tin un mihó karakter na mundu ku Hosé Smith, Junior, e profeta, i su ruman, Hyrum Smith..."¹

Brigham, usando palabranan di Beibel (I Juan 4:2-3) a kita nòmber di Hesus i remplas'é ku nòmber di Smith:

"Lo mi duna mi skritura awor—'Ken ku konfesá ku Hosé Smith a wòrdu mandá di Dios...ta spiritu di Dios; i tur spiritu ku no konfesá ku Dios a manda Hosé Smith, i revelá e evangelio etèrno pa medio di dje, ta di anti-kristo..."²

Mormonnan ta duna impreshon ku nan fundadó tabata un santu, un profeta di Dios. E outor mormon, John J. Stewart, a skirbi ku e tabata "kisas e hòmer mas manera Kristo ku a biba na mundu desde Hesus mes."³ Sinembargu, bastante evidensia ta sali na kla ku ta proba ku e "profeta" ku iglesia mormon ta pinta asina bunita tabata hopi diferente di e Hosé Smith históriko. Ki tipo di person e líder mormon tabata?

I. HOSE TABATA EGOISTA

Maske Smith no a kaba skol básiko, e tabata un bromadó formal di su sabiduria: "Mi ta un abogado; mi ta un gran abogado i ta komprendé shelu, tera i fièrnu, pa trese dilanti konosementu ku lo tapa tur abogado, dòktor i otro esfera grandi."⁴ "No buska abogadoan, òf paga nan pa nan konosementu, pasobra mi sa ku nan no sa nada. Mi sa mas ku nan tur."⁵ Na un otro okashon el a gaba:

"Henter mundu ta duna tèstimonio di mi ku mi no por wòrdu konkistá, manera un baranka haltu den laman ku a soportá e olanan poderoso pa síglonan... Mi ta batayá erornan di siglonan; mi ta enfrenta violensia di multitutnan; mi ta trata ku proseduranan ilegal ku outoridat: mi ta kòrta e

kònòpi prinsipal di poder, i ta solushoná problemanan matemátiko di universidatnan, ku bèrdat—bèrdat di diamante; i Dios ta mi 'ayudante'"⁶

Ta parse ku José Smith mes a kere ku e ta igual òf mihó ku Hesus:

"Mi tin mas rason pa gaba ku kualke otro hende. Ami ta e úniko persona ku a yega di mantené henter iglesia uní desde tempu di Adam... Ni Pablo, Juan, Pedro, ni Hesus a logra hasi esei. Mi ta broma ku ningun hende a yega di hasi un obra manera ami! E siguidónan di Hesus a kore for di djE, ma nunca e Santunan di e Delaster Dianan a kore for di mi ainda."⁷

Un habitante di Nauvoo, Charlotte Haven, a opservá di Smith ku e ta "...un gran egoista i bromadó ..." ku e ta "...e egoista mas grandí ku mi a yega di enkontrá" ku "...tur ora e ta papia di su mes, loke el a hasi i por hasi mas ku otro hende, i remarká ku e ta 'un gigante físiko i mental.'"⁸

II. HOSE TABATIN SET PA PODER

Militar tabata un hòbi di José Smith. Na vários okashon, el a organisá un ehérsito mormon—e promé biaha tabata kuater aña despues di skirbi *Buki di Mormon*. Ningun di su ehérsitonan tabata bou outoridat di gobièrno merikano. Smith mes tabata kabesante, i a gusta i pa nan yam'é "Lieutenant-General José Smith" i a kana lusi ku su bistí militar.

Pero e "profeta" tabata ke mas poder i fama ku un líder militar. P'esei na sekreto el a inisiá un "Konsilio di Sinkuenta" i a laga orden'é komo rei. Na 1853 Mark Williams, un miembro di e "Konsilio di Sinkuenta," a duna di konosé "Ami tambe tabata testigu di e introdukshon (sekreto) di un gobièrno real, den kua José a pèrmití p'e ser ordená komo rei, pa reina riba kas di Israel pa semper..."⁹

Pero asta un "reino" no a satesfasé José Smith. Na aña 1844 Smith kore kampaña pa bira presidente di Merka. Heber C. Kimball a laga sa ku e ansianonan mormon mester a "...bai na tur e diferente estadonan pa organisá reunionnan...i buska voto pa José por bira e siguiente presidente."¹⁰

Tur esaki a hasi un impakto riba e bisiñanan no mormon na Nauvoo. E spiritu di militarismo a spanta nan i pone nan keda deskonfiá di e intenshonnán di Smith i su siguidónan mormon. Sin duda esaki huntu ku Smith su metanan polítiko tambe tabata faktornan ku a okashoná su propio asesinato.

III. HOSE TABATA VIOLENTO

Smith tabata un hòmber robusto, i a gusta demonstrá su forsa ku deporte, espesialmente "lucha libre" stail olímpiko. Ta parse ku José Smith di bèrdat por a bati su oponentenan.

Smith no solamente tabata fuerte; tambe e tabata rabia mashá lihé, i tin ora esaki a sali fo'i man i a resultá den violensia. El a skirbi di un persona den un multitut ku a atak'é: "...e hòmber ku mi a skòp a bin serka mi i a pone su man tur na sanger den mi kara, (pasobra mi a dal e su riba nanishi)..."¹¹ Ora iglesia mormon a reproduś e storia aki komo parti di nan historia ofisial, nan a ekskluí "pasobra mi a dal e riba su nanishi."¹² Di un otro okashon el a skirbi "Josiah Butterfield a bin na mi kas i a insultámi asina tantu ku mi a skòp e for di mi kas, for di mi kurá, i mand'é riba kaya."¹³ Un otro biaha e "profeta" di Dios a atmití ku el a purba choka Walter Bagby: "Mi a top'é, i el a papia ku mi na un manera degradante, i a kohe un piedra pa manda riba mi: mi a koh'é na su garganta pa chok'é."¹⁴ Calvin Stoddard a konta di un okashon ku

"Smith a bin dal e riba frenta ku man habri—e sla a pon'é kai, ora Smith a sigui dal é kuater òf sinku biaha, masha duru—e sla a hasi e siegu—ku Smith despues a bin pidié pa

pordon'é..."¹⁵ Por duna mas ehèmpel di akshonnan ku no ta kuadra pa un supuesto hòmbler santu.

IV. HOSE TABATA UN MENTIROSO

Doktrina di iglesia mormon ta basá di gran parti riba siñansa di José Smith. Komo ku esei ta bèrdat, ta importante pa paga bon tino si Smith i e otro lídèrnan mormon di bèrdat ta konfiabel komo boseronan di Dios. Nota algun di su deklarashonnan i puntra bo mes si nan ta ekspreshonnan di un hòmbler di Dios?

Smith a siña ku ora un persona kombèrtí na mormonismo i ta batisá, su sanger "pagano" literalmente ta sali for di su adernan i ta remplasá pa sanger hudiu: "...e efèkto di Spiritu Santu riba e pagano ta pa purifiká e sanger bieu, i ta hasié simia di Abraham en realidat."¹⁶ E profeta mormon a deklará ku luna ta poblá pa hende ku estatura di seis pia i ta yega na edat di mil aña. Tambe el a deskribí nan bistí.¹⁷ E fundadó di mormonismo a duna di konosé ku e tin e relato antiguo di kreashon ku Moises a usa ora el a skirbi e buki di Génesis.¹⁸ Segun Smith, hòfi di Eden tabata lokalísá na Jackson County, Missouri (maske Genesis 2:8-14 ta bisa ku e hòfi no por tabata situá na e kontinente norteamerikano). El a yama e sitio "Adam-On-di-Ahman" (*Doktrina i Aliansanan* 116:1) i a bisa ku algun baranka den su serkania ta loke a sobra di e altar ku Adam a traha despues di su ekspulshon for di hòfi di Eden. Tambe el a deklará ku Noé a konstruí su arka serka òf na estadonan di Carolina.¹⁹

Di deklarashonnan tan ridíkulo por konkluí ku òf José Smith tabatin un imaginashon sumamente aktivo i un talento pa konta kuenta eksagerá (loke Lucy Smith, mama di Smith, i hopi otro testigu a afirmá) òf e tabata gaña. Talbes tur dos ta bèrdat. Ma ningun di e alternativanan ei ta kuadra pa un profeta di Dios.

Deuteronomio 18:20-22 no ta laga duda kon pa determiná ken ta un profeta bèrdadero di Dios:

“Ma e profeta ku ta tribi papia un palabra den Mi nòmber ku Mi no a orden'é papia, òf ku e ta papia den nòmber di otro diosnan, e profeta ei mester muri.' "I si bo bisa den bo kurason: 'Kon nos lo konosé e palabra ku SEÑOR no a papia?' si un profeta papia den nòmber di SEÑOR i e kos no sosodé ni bira realidat, esei ta loke SEÑOR no a papia. E profeta a papia esaki ku tribilidat; no tene miedu di djé.”

E teksto aki ta indiká ku si un profeta su prognostikashon no ta kumplí palabra pa palabra, ta klaro ku e ta un profeta falsu, e no ta di Dios. Kon José Smith a midí segun midí di e Skritura aki? Kon konfiabel su "profesianan" ta?

David Whitmer, un di e testigunan di e *Buki di Mormon*, a konta ku Smith a haña un revelashon ku "algun ruman mester bai Toronto, Canada, i ku (aya) nan lo bende e derechu di imprimí e *Buki di Mormon*. Hiram Page i Oliver Cowdery a hasi e biaha pa Toronto ku e propósito aki, ma nan esfuerso pa bende e derechu di imprimí tabata un frakaso total, regresando sin plaka." David a agregá ku "hopi otro revelashon falsu a bin dor di hermano José..."²⁰

Skritura mormon, *Doktrina i Aliansanan* 84:1-5, ta inkluí Smith su profesia di sèptèmber 1832, ku un tèmpel lo ser konstruí na Independence, Missouri, durante e generashon ei mes. Ma te awe konstrukshon di e tèmpel ni a kuminsá; un profesia ku mormonnan a antispá lo a keda kumplí literalmente.

Hosé Smith a profetisá: "...binida di Señor, ku ta serka—asta 56 aña lo kompletá e esena."²¹ Dia 5 di aprel 1843, Smith a skirbi: "...mi ta profetisá den nòmber di Señor Dios—& lag'é wòrdu skirbí: ku Yu di Hende lo no bin den shelunan te ora mi tin 85 aña, 48 aña for di awor òf mas òf ménos (aña) 1890..."²² Ora Kristo no a bin e fecha ei, mormonnan a pone 14 di febrüari 1891 komo e fecha, i ainda nada a sosodé.

Na mei, 1843 Smith a bisa "...mi ta profetisá den nòmber di Señor Dios di Israel, ku si Merka no rektifiká su maldatnan kometé kontra e Santunan (mormonnan) na estado di Missouri i kastigá e krímenan kometé pa su ofisialnan ku den poko aña e gobièrno lo ta destruí i ruiná, i ni un pida lo sobra."²³ Esei no tabata e úniko profesia kontra gobièrno merikano ku a resultá di ta profesianan falsu.

Mormonnan ta mantené ku José Smith su profesia di guera sivil na Merka ta proba ku e ta un profeta di Dios. El a prognostiká: "Di bèrdat, asina Señor ta bisa tokante e gueranan ku lo bin pronto...i tempu lo bin ku guera lo ta bashá riba tur nashon, kuminsando na e lugá aki. Ata, e estadonan di sùit lo ta kontra e estadonan di nort, i estadonan di sùit lo yama otro nashonnan, asta nashon di Gran Britania i...nan lo yama otro nashonnan, pa nan por defendé nan kontra otro nashonnan; anto guera lo ta bashá riba tur nashon" (*Doktrina i Aliansanan* 87:1-5). Ma mirá mas djaserka, Smith a prognostiká esaki durante i tokante di un rebelion na desèmber, 1832, ku den algun luna a keda solushoná sin guera, maske hopi hende a kere ku lo tin guera. Asta si tuma e prognostikashon aki komo un profesia di e guera sivil merikano di 1861 te 1865, tin hopi parti di e detaye ku no ta kuadra. Por ehèmpel, guera no a wòrdu "bashá riba tur nashon," nashon no a bringa kontra nashon, Gran Britania no a tuma parti. Segun Skritura, tur detaye di un profesia di un profeta di Dios mester ta kumplí palabra pa palabra.

Si José Smith tabata un profeta di Dios, lo no tabatin nodi pa iglesia mormon skonde su profesianan pa hende no haña sa nan contenido falsu òf ridíkulo.

Maske Smith a muri ku 38 aña, el a insistí ku el a risibí bishita di Dios Tata, Hesukristo, Juan Batista, Pedro, Santiago, Juan, Moises, Elias, Elia²⁴, angelnan Miguel, Raphael, Nephi, Moroni, Mormon i posiblemente otronan. A base di e "bishitanan" aki so nos por yega na un di dos konklushon: òf José Smith tabata un di e profetanen di mas grandi di tur tempu, òf e ta un gañadó formal i pues un profeta falsu.

V. HOSE TABATA UN BEBEDO

Dia 27 di febrüari 1833, José Smith a haña un revelashon konosí pa mormonnan komo "e palabra di sabiduria:" "...esun ku bebe biña òf bebida stèrki entre boso, ata esei no ta bon, ni ta bon den bista di boso Tata...bebída sterki no ta pa stoma...tabaku no ta pa kurpa, ni pa stoma, i e no ta bon pa hende...bebidanan kayente no ta pa kurpa ni stoma. Si, karni di tur bestia i di e paranan di shelu, Ami, Señor, a ordená pa uso di hende ku gradisimentu; sinembargu nan mester ta usá moderá; i ta agradabel na mi pa nan no wòrdu usá, solamente den tempu di wenter, òf di friu, òf di hamber." (*Doktrina i Aliansanan* 89:5,7-9,12-13). Pues mormonnan ta siña ku bebida alkohóliko, biña, "bebidanan kayente" (esta kòfi i te) i tabako di tur forma ta prohibí. (Ta notabel ku maske nan ta prohibí esakinan, nan no ta pone un limitashon na e uso di kome karni, maske e ta forma parti di e mésun revelashon.)

E revelashon aki ta konsiderá un di esnan mas importante. Un persona ku no ta obedesé ta prohibí di drenta den e tèmpel mormon. "Profeta" Smith tambe a enfatisá importansia di e revelashon aki: "Ningun miembro ofisial di e Iglesia aki ta digno di tin un puesto despues ku e palabra di sabiduria a wòrdu siñá korekto n'e; i e miembro ofisial, ta negleshá di kumplí ku ne òf obedesé."²⁵

Pero José Smith mes no a praktiká loke el a prediká—un echu ku lídernan mormon ta tene sekreto—deskalfikando su mes di ta miembro di e Santunan di e Deláster Dianan, i sigur no nan presidente. Ta un echu ku Smith "a kore (kabai) dor di e kayanan di Nauvoo humando un sigá."²⁶ Smith su diario, fechá 11 di mart 1843, ta konta ku el a bebe te pa desayuno i ku e lo a preferá pa e te mas stèrki. Ma ta José Smith su bebementu di bebída ku ta mihó dokumentá. Smith a skirbi den su diario dia 20 di yanüari 1843, "Ansiano Hyde a konta di biña blanku ekselente ku el a bebe...José a profetisá den nòmber di Señor—ku e lo bebe biña huntu ku ne den e pais ei."²⁷ Na un otro okashon Smith a skirbi ku el "...a bebe un glas di serbes na Moessers."²⁸ Dia 2 di mei, 1843 José Smith a "...bebe un glas di biña huntu ku Hermana

Jenetta Richards, ku su mama a traha na Inglatera."²⁹ No ménos ku 17 dia despues, Smith a skirbi "anochi mi a papia hopi tempu den bar..."

Ma profeta Smith no a bebe serbes so. El a risibí aprobashon komo alkade di Nauvoo pa bende bebida alkohóliko segun el a haña ta bon.³⁰ Yu di José Smith mes a konta ku ora su mama, Emma, a bolbe di un bishita na Saint Louis, el a haña ku Smith a konstruí un bar den su kas i a stòk e kla pa servisio. Emma a duna Smith un ultimátum: òf e tin ku saka e bar for di kas òf e i su yunan lo bai. José a kit'é mes ora.³¹ Otro líder mormon tambe tabata kulpabel di hipokresia—prediká apstenshon i tòg bebe, traha i bende biña i serbes.

Mormonnan ta halsa nan líder spiritual riba nivel di Hesus tapando kara pa tantu defekto. Ta klaro ku e José Smith tan onrá di mormonismo ta un engaño kompará ku e José Smith históriko.

-
- 1
 - 2
 - 3
 - 4
 - 5
 - 6
 - 7
 - 8
 - 9
 - 10
 - 11
 - 12
 - 13
 - 14
 - 15
 - 16
 - 17
 - 18
 - 19
 - 20
 - 21
 - 22
 - 23
 - 24
 - 25
 - 26
 - 27
 - 28
 - 29
 - 30
 - 31